



Tablets pel s-chalin ot in scoula

Il plan d'instrucziun 21 prescriba cha las scoulas dal s-chalin ot han da far in avegnir adöver da mezs electronics per l'instrucziun. La suprastanza cumünala ha deliberà il credit per tour a fit tablets (iPads), chi vegnan dovrats da la magistraglia e dals scolars per l'instrucziun d'ürant ils prossems trais ons da scoula.

Bogn da famiglia – rimplazzamaint igluminaziun in LED

L'igluminaziun i'l Bogn da famiglia es veglia e sto gnir rimplazzada. Las lavurs pel rimplazzamaint da l'igluminaziun cun glüms da LED es gnüda surdatta a la firma Roner & Partner a Zernez. Quist rimplazzamaint vain sustgnü dal chantun Grischun cun üna contribuziun finanziaria.

Provedimaint electric Zernez, part "süd"

Il provedimaint electric illa fracziun da Zernez es in possess dal Cumün da Zernez. Dal 2016 es gnü elavurà ün concept a regard l'infrastructura electrica da la part „nord“ da la fracziun. Uossa es avantman eir il concept per la part „süd“ chi cumpiglia eir l'infrastructura electrica a Brail, Carolina, Arduond, Prazet, Pignai e Champ Sech/Ova Spin. La suprastanza cumünala ha deliberà il concept correspondent uschè chi po gnir cuntinuà cul proget e cun las calculaziuns dals cuosts per la dumonda da credit necessaria.

Rendaquint 2016

La suprastanza cumünala ha repassà detagliadamaing il rendaquint 2016 insembel cul revisur extern da l'uffizi da cumüns dal Grischun, cun la cumischiun sindicatoria e la direcziun operativa. Il rendaquint, chi serra giò cun ün resultat fich allegraivel, es gnü approvà e deliberà a man da la radunanza cumünala dals 28 gün 2017.

Cumprita parcella e stabilimaint da René Hohenegger Sarl in Cul a Zernez

La radunanza cumünala dals 22 mai 2017 vaiva decis cha'l Cumün da Zernez dessa insister sül dret da precumpra da la parcella 1180 da la firma René Hohenegger Sarl e d'instradar trattativas da cumpra cul possessur. I s'ha in seguit s'abinà sül predsch da cumpra e calculà las investiziuns necessarias per pudair far adöver dal stabilimaint, in prüma lingia per las Gestions Tecnicas e pels pumpiers. La suprastanza cumünala ha pasà giò ils avantags e dischavantags da la cumpra ed es gnüda a la conclusiun da propuoner a la radunanza cumünala la cumpra da la parcella cul stabilimaint da gestiun. La dumonda da credit vain preschantada a la radunanza cumünala dals 28 gün 2017. Quist credit rimplazzess il credit chi d'eira stat concess l'on passà per müdar intuorn plü tard la halla da ziplas per l'adöver da las Gestions Tecnicas e dals pumpiers.